

四庫全書

集部

欽定四庫全書

集部

海桑集卷七

詳校官編修

臣

翟槐

中書

臣

劉源溥覆勘

總校官庶吉士

臣

倉聖脉

校對官中書

臣

袁文邵

謄錄監生

臣

歐陽愛

欽定四庫全書

海桑集卷七

明 陳謨 撰

記

堅白齋記

三衢徐公炳文繇明經起家為國朝蓋臣當肇基之日
征謀治法拓疆取亂飲至策勛是不一見入則典司政
本出則父母羣黎乃若守令之職民之師帥尤上所躬
親簡拔非賢不銓公自內出知彭澤知分寧皆不踰再

期而調政用書最民戴猶所生去官日攀轅泣慕至新任境上不絕改知韶州余獲拜焉韶支邑四地方四百里入新朝幸得沐寬政聞公先聲長老秀民咸致慶幸以為輟禁中頗牧為渤海龔遂用意深遠公既視篆按韶之故更其所宜更飭韶之吏律其所不律寅而入酉而休率以為常公上之應必務先期庶政之繁無微不理屬縣之承風采為新曾未三月紀綱悉振公曰讀書之齋扁以堅白子為我記之余復曰公所立有古良弼

之風皆堅白之用也堅白其本也昔者孔子生於春秋
固以天下無不可為之時無不可改化之人蓋生物之
仁體道之權也子路不察而不悅於佛肸之召故以堅
白不磷緇者教之又以匏瓜不飲食者警之夫心有主
而不動擴然大公物來順應憂樂行違確乎不可拔者
堅也清明在躬氣志如神皦然不可泥滓常與日月爭
光者白也磨涅不能變也非聖人乎如是而後無可無
不可君子之學之用斯其的矣堅不足者磨必磷不足

與有立白不足者湮必緇不可與有明若公之介介傑
特奮義不回耿耿玉雪潔身保素其行無隨其色無絢
叅議台鼎樞謨宥密芻牧邊郡眷倚深重聞望表暴非
堅非白曷以濟此若夫其磨其湮不磷不緇充之極之
四輔之班九命之制五院之憲無所不可者又詎止五
馬之榮一麾之重而已哉

韶州重建府治記

韶為粵壯郡秦屬南海漢初屬桂陽三國入吳爾後析

置不常其得成州而以韶名則自唐武德四年始蓋析
廣之曲江始興樂昌翁源置焉貞觀初又析置湏昌仁
化二縣統縣六乾和四年割湏昌始興置雄州迄宋元
豐間皆統縣四乾道三年又析曲江樂昌置乳源至元
間又析曲江置新民併翁源歸曲江皆統縣五今新民
廢所統者曲江仁化樂昌乳源而已以廣輪計實周官
方四百里之地誠壯郡也歲在癸卯古復錢侯朝陽來
守茲土既浚隍高城民以奠枕乙巳歲則大熟乃相府

治敝陋弗稱謀撤而新之若貳及幕議以克合侯曰屬
邑疲瘵役不可加即捐俸鳩工掄材通守郭飛幕長程
玘併力一心役以丕作得木率異材其尤異者雙幹共
根干霄百年絕崖礫壑致之若夷雙梁天成若有相焉
以待興者底法基構悉增厥舊既其竣事高明有顓盤
盤焉皇皇焉古諸侯外寢殆不是過經始於乙巳九月
落成丙午四月前為儀門三間中為設廳五間東西廡
為吏舍十二間前曰麗譙之樓仍其故而奐之后曰燕

處之齋易其構而偉之旄倪族觀咸嘖曰由至元丙子
一炬至大間重見今九十載未有壯觀若斯者於是昔
之湏武二水紆徐演迤肘腋夾流又若決而駛若䟽而
湧以襟帶會同乎郡之南昔之韶山諸峰如蓋如冒如
怒猊渴虎如芙蕖出波者又若騰起於羅浮馳騫於衡
桂以羽翼張皇乎郡之左右噫微太守孰臻茲哉太守
樂公宇之成嘉民俗之熙端居黃堂無訟之可聽第佩
服圖史以永終日而已彼漢衛颯茨克遺愛於粵宜不

多讓乃耆俊士民合辭來請文勒石余屬筆不愧者錢
侯守官廉待物惠養民裕興學嚴昔固稔知之暨余過
南雄入學宮讀錢侯碑其父老曰錢侯我慈母也當韶
款附日韶父老遮道願得南雄守撫我即安矣軍師如
其請奪我慈母者韶也迄今四年韶多惠政以此茲不
悉書者記為建郡治作也然韶多先賢遺跡諸所宜起
廢滋多侯皆次第圖之繼是將不一書矣

竹間記

嘉植之類其清者三曰竹曰梅曰松而已松之清以直
氣梅之清以雅韻而竹兼之有直氣而無其偃蹇有雅
韻而無其娟妍者也故竹之間尤至清所在而君子尚
之然而日至于其間者寡矣不日至于其間而以號於
衆曰友竹友竹者是友其外也名也與竹而二竹莫之
愛也必常處乎其間然後竹與我莫逆斯心也非名也
而我與竹一矣晉唐來友竹者是不一二止吾獨取王
子猷焉子猷所居所至毋論淹日月久近即命種竹或

怪之則曰何可一日無此君是斯須顛沛不離其間也
或植嘉竹則未問主人徑造竹所是心乎其間而忘乎
其外也古今賢達高致尚有若此者哉聞子猷之風而
興者吾得王簡夫氏其為已處官有直氣無偃蹇有雅
韻無媚妍凡比德於此君者實盛似子猷無地無竹無
時不在竹間而簡夫如之又甚稱吾聞南華之山九成
臺之下曲江之墟以仙隱則宜以吏隱則宜以大隱則
唐相張公之宇也簡夫植竹焉日與賢人大夫嘯咏其

間海邦之民蒙安靜之政樂豈弟之澤得與優游於陵
谷谷陵之外者又子猷之所無也因為君記竹間廼併
書之

翠庭記

韶州指揮張公月山有幕府知事周君景宜余至韶始
相見即相知且知之深其世文儒也其宦學才能吏也
別字翠庭指揮大書揭之屬其記於余余諾焉久而未
有以復景宜也蓋自濂溪夫子庭草交翠至是二百餘

年無論方內外門地問學高下皆知尊慕以為字若別
字不可一二數故吾不敢輕為景宜記者有待也一日
偕景宜指揮所見砌下草深至膝勿剪指揮曰草猶民
焉得雨而滋長不擇地淺深疎密各光潤可愛吾故不
欲剪之嗟乎是足以記翠庭矣景宜常以公命撫鎮贛
之平川浚濠崇城修學校鑄祭器善澤民民至今歌頌
盈耳及從公於韶又五年公有熊虎之威有陽和之煦
君一切奉承惟謹寧其身一布其飯一蔬而民無間焉

彼其賊民如割草菅芟夷蘊崇勿俾能植而常以加於
善良與無辜者亦獨何心哉君思指揮存心而觀於其
庭之翠焉即瀟溪奚遠且瀟溪不嘗為提刑於韶乎遺
澤洋溢殆千歲未慙皆其不除草一心充行之也固宜
尚服之無斃君故汴開封人曾大父宋南渡仕至南雄
通判大父志學延祐初為贛儒學教授因家焉故占贛
籍云

交翠軒記

僕客韶陽再歲稔聞南康知縣周侯道和政治居最恨
不得一面暨出額抵蓉江謁侯於交翠軒其容也德其
服也士其言恂恂而其神采朗朗如明月之入懷也周
觀其邑郭氓恬俗熙貨阜於往時物賤於他郡詢其田
里無惰農謹徒公租不逋私蓄自餘昔之窮山負固環
二鄉連十數歲不受約束者皆浼首庭下樂侯寬政嗚
呼斯實行仁心者之效哉侯蓋學問根於天性讀周元
公書玩太極圖達陰陽五行萬物生生變化之妙壹始

於四德之元而在天之元於時為春於人為仁元天德之首春生物之始仁衆善之長也萬物各具一太極而物各有初即物物可以觀仁元公玩庭草交翠而樂之意蓋出此學於元公而洞見道體者程子也程子謂雞雛最可觀仁雞雛之初生可愛猶草色之秀潤可玩也古人稱欣欣物自私又稱花柳更無私語皆近道無私者物各付物自私者各全其元公之不剪草者不忍傷夫草之天也不忍傷其天者使其欣欣焉得自私也推

是心以父母斯民安有疾痛疴癢不切吾身哉周侯取
於元公以名軒可以觀侯之心之學而軒之所有第古
令名畫法書諸賢記詠而止可以見侯之清侯復審其
義焉僕以為觀交翠而得元公光風霽月之宇者有矣
因交翠觀仁以識元公之心與元公之政者不多見也
南安為元公仕國前史班班異績不嚴以威人不忍欺
所在化服及為韶州提刑撫良鑄頑控交御越海邦以
寧充是心之仁形是政之仁跡其愛民猶愛草焉周侯

為南康美化善政不勝書既得民之歡心矣名軒交翠
孰曰不宜詩不云乎高山仰止景行行止敢以為侯勉
又云惟其有之是以似之敢以為侯頌

上池記

天地間陽氣為輕清為高明陰氣為重濁為奧濶故陽
仙道陰鬼道服食之士煉形至於純陽則仙矣史記稱
長桑君出懷中藥與扁鵲曰飲煮以上池之水三十日
當知物矣註謂水未至地承取竹木上露也夫上池者

天地也雨露霜雪皆本於天地然固不若露之尤清故上池之水陽也地上之水與凡溪流井竇皆陰也方士教武帝承取金莖露和玉屑食之長生即長桑君說也而武帝多欲不能蛻陰濁雖服而無驗不若扁鵲服之超然物表達乎聖入乎神遂能隔牆見人五臟為人起死而發其秘於內外經以為萬世民命計皆長桑君之教也廬陵鄒君舉世為名醫家以避地寓韶陽有年研精博究存心愛物不擇貴賤高下悉與善藥累累奇效

人服其精而德其仁故廣東憲副楚之奇劉公扁其室
曰上池大書揭之蓋納之於輕清高明之域而欲其盡
神聖工巧之道也余來韶君舉求記焉余復於君曰扁
鵲至矣不可以庶幾夫聖與神上智之事工與巧君子
所宜勉也能盡扁鵲之法以活斯人是亦扁鵲而已矣
不然竹木上露令猶可飲也不得長桑君懷中之秘烏
能知物哉吾又以君舉一身亦有上池存焉蘇長公所
謂下湧於舌底上流於牙頰白而不汙甘而不壞宜古

之仙者以為金丹之祖長生不死之藥者是也惜余不遇長桑君而質之君舉以為何如邪

自然堂記

士有不樂於時棄軒冕珪裳外託於黃冠草服而內存其憂世之心者因別字曰自然以質於海桑散人散人曰子嘗然乎然不然乎不然以為自然乎曰然散人曰然乎然非自然也不然乎不然亦非自然也然適也不然莫也君子無適未嘗然無莫未嘗不然故未嘗然而

嘗然然未嘗不然而無不然者天下鮮矣然則孰為近
曰道所貴者中中所貴者權然乎然者衆人之然非吾
所謂然也不然乎不然者衆人之不然非吾所謂不然
也以是為自然豈其至哉且子嘗奔走於名利之區顛
倒於是非之數今而得養真於韶石正淵明所謂返自
然者內觀靜照可也槁木其形死灰其心不可也靜亦
定動亦定可也靜而無動動而無靜不可也卧起云為
順適其常黑白薰蕕不迷乎中坎止流行無繫乎外如

是而已老氏蓋無為而無不為此自然之至也彼或冥然悍然自以無累隨俗脂韋自以有經衆之然然所不然不然吾惑焉耳矣君曰子之言博哉願誌于室或曰君方從事於丹砂秋石以利人惡乎自然也夫利人固君子憂世之盛心丹砂秋石特其小者耳焉足病乎自然姓鄭名某韶州人仕至英德州棄官學道蓋徧叅諸方晚乃遇方丘生指視要歸躍如也駸駸乎自然矣吾故喜而記之

玉齋記

韶郡幕得賢侯程君國玘番陽人也由雩都尹改南安
幕長入王朝調韶州知事所至皆有惠愛剛不折柔不
廢君子以玉扁其齋蓋比德焉其嘉賓楊子良從侯雩
都及韶雄最久具道侯意介子為記按字書玘佩玉也
玉之為器至貴其大者蒼璧禮天黃琮禮地珪璋琥璜
以方祀天子執琕而公侯伯子男各執其命圭也其最
近人而不可斯湏去者則莫如佩玉在禮凡帶必有佩

天子佩白玉而玄組綬公侯佩山玄玉而玄組綬大夫
佩水蒼玉而純組綬士佩璫玟而緼組綬豈徒取其進
退抑揚左右宮商周折規矩而已哉昔子貢問於孔子
曰君子貴玉而賤珉者為玉之寡而珉之多歟孔子以
為非為珉之多故賤之玉之寡故貴之也蓋玉溫潤而
色光澤近於能柔玉廉隅而不傷剝近於能剛剛義也
柔仁也其文瑕不掩瑜瑜不掩瑕忠也其采孚尹旁達
不有隱翳信也天下之道孰有大於仁義忠信者乎夫

玉脩仁義忠信之德以形於珩璜璚琚之用君子佩之孰有美於此者乎程侯繼令以往將佩水蒼焉則命為大夫艾服官政時也主此忠信由此仁義也又階而陞之將佩山玄焉則侯執信圭公執桓圭時也亦由此仁義主此忠信也德與玉相輝年與德俱劭事業垂之無窮焉有非克自好修何以致之經曰玉不琢不成器又曰他山之石可以攻玉不然玉雖有相而無文何以為佩故以石攻玉猶人以患難成德也以玉人雕玉猶人

取諸人以為善也侯敫歷險艱以有今茲其成器而貴重宜矣不尚有可勗哉請以是記于齋焉

居南記

往年王霄翁由翰林提文印出江西風流篤厚見者心醉其談笑筆墨人至今傳誦寶愛不替潁平川亦其游行嘯歌遺化處故老往往能道翁狂嬉狎酒韻致婉君可發侍翁時年甚少翁頗嘉之為扁其室曰居南以可發居縣南涯去縣不里許而逸蹤塵表故自可尚今可

發年八十年華屋落兵燼為草墟舊扁不存僅僅葺環
堵狹於漁刀而想見翰林如故時時肅容禮客第言言
居南居南真若不負當日賞譽期望者余故心敬之邑
大夫朱君又為大書居南二字存之髣髴余嘗坐室中
蔭百年之嘉樹玩五畝之丘園俯仰感寓竊計海屋添
籌凡幾柴桑甲子殆不勝書而余與君白頭如新相對
如夢承平不復見矣第逍遙水竹間狎魚鳥伍樵牧以
永斯夕耳讀圻者王承福傳亂來何地不然獨幸君居

南基址固無恙計自今以往子孫孫子繩緝蟬聯殆百世保此南而居之也則是南之無恙特存乎其世而不係乎扁之存亡其世常不替焉而扁與之俱矣凡君之後人誦斯文者其不油然而動於其中乎如是而不興起大其家者未之有然也

梅坡記

贛貳守楊侯廷舉由蕪湖令七年政成遂遷是職傳曰君子學道則愛人侯從安慶郡將余公廷心學有用之

學養之者素定故更為廉吏官為能官宜也別字梅坡
用以自況僕記之曰夫溪澗之植未離於奧潔亭軒之
種或近於褻玩深山窮谷又至於荒寒非梅之佳致也
坡雖高可親梅至清不雜質之清居之高不雜於衆而
可親焉其惟豈弟君子民之父母乎彼繁華所都衆芳
所在非無幽人之貞處女之靜飛仙之綽約節士之天
矯然而混混於春風爛熳之場其皦然不滓歌舞之塵
者幾希此清而病其雜也彼蠶叢魚鳧之國龍門鴈蕩

之高崑崙天柱之頂黃鵠不敢度獼猴莫能飛徒使孝子迴轅而顧惜忠臣叱御而骨驚者此高而病其不可親也楊侯吏為廉吏節儉而矜嚴玉潔而冰瑩其不雜也如此楊侯官為能官母愛赤子飢者哺之寒者衣之疾病呻吟者惠鮮之其可親也如此是坡也委蛇起伏平岡遠阜長洲茂苑散見層出映帶參差而橫枝却月直榦凌風車馬冠蓋童兒艾耄掇芳襲馨日往來游衍其間佳致為何如哉吾以章貢所見於侯者如是為侯

記焉而侯學於余公者不止是也風霜之餘華者就實
然後為不負所學異日尤當不一書之

中庸齋記

清江碧嶂之間余得有熊氏族裔名中而字克庸穆穆
乎識時達政之才賢也入其齋扁曰中庸之齋凡所倚
寓即揭以自厲且介余記之予因得至交相勗之誼焉
昔者往聖先哲或出或處殊蹟而同歸素富貴則道行
乎富貴素貧賤則道行乎貧賤素夷狄患難則道行乎

夷狄患難道者時中而已時中所在即所以為庸微之
為寢興服食大之為車馬戎兵恒之為九法三綱變之
為禪授放伐各一其時則各取其中合焉而安榮戾焉
而危辱孰非平常不易之理哉克庸修之身有學有守
用於時有猷有為孝弟隆於家忠信孚於人即其言恂
恂以慤與之居栗栗而溫而當夫天造草昧四郊多壘
時出其才而小用之施足以德鄉鄰力足以援檻穽殆
不勝計使在春秋戰國彼諸侯之大夫烏足以辱君哉

吾固知克庸厚積薄發可以富貴貧賤而安可以夷狄
患難而宜亦要其適中能庸與否何如耳是齋也載籍
前史以實之名畫法書以鏤之江山風月以藩落之直
諒多聞以匡翼之而滋蘭樹蕙含英咀華墳簞翕如也
菽水歡如也所以張皇榮寵於是齋者靡不畢脩吾夫
子蓋曰君子中庸又曰民鮮能久矣夫凡民之所鮮能
而君子之所獨能也豈易及哉余故樂為克庸氏記之
且將復焉以自勗云

蓬窓記

夫坐鑒杯水而江湖百川不為大者善言天下者也善
言天下者天下小於一室夫豈必登魯泰山而後為真
有見也友生某於其書室之側啟窓焉從廣度之僅僅
函丈許時時與客嘯傲其間扁曰蓬窓吾常過之坐我
於蓬下不啻濤掀浪蹴挈舟入港子而風馳雨突舟人
各欽衽跼蹐畧不見偏仄窘態第覺折旋俯仰更極中
適及其語劇興移軒軒出蓬外袖拂飛鳥平臨大江游

而上者為嶺嶠為海瀧為島夷洄而下者之淮之漢之
衡之荆車帆無時烟雲互吞第一送目頃而可意得之
則皆吾蓬外物也窻果小乎哉曰蓬窻云者寓也亦所
以志也吾不得時坐窻中請約法焉凡過逆旅而斗酒
濯足造竹所而不見主人與飢而釣跛而度者負薪而
行歌騎牛而讀漢書者皆善言天下者也生審無失士
而謹識之異日取其奇言以告我

樂志山房記

孟子論曾子之孝其親蓋曰養志而曾子論君子之養老則曰樂其心不違其志夫養而未臻其心之樂非孝也欲臻其樂然或不能先意承順一志苟或違一心之體戚焉烏乎樂也故志者心有所向往未形於色辭凡人子所可知者也於焉弗有違亦焉往而有違焉往而不樂哉此養之至也吾友楊允恭孝於事親力非甚有餘而養必致其樂養必常豐而常必適其宜亂來避地村莊養志復如城居揭其讀書之齋曰樂志山房子嘗

過之望其垣殆儒有一畝之宮歟入其樊翳然林水木
殆泌之洋洋可以樂飢歟休其蔭有青青者焉有如簣
者焉殆武公之淇澳歟履其畝禾役旆旆然黍稷翼翼
然殆豳民之本富歟於是室家攸宜而芋以寧也塤簞
如貫而翕且孺也入厨具甘旨上堂問起居而其親不
知塵埃之眯目風流之隔代也竊獨悲夫曩者運昌時
泰家肥屋潤位高祿豐者能養志使樂曾幾何人哉不
以遺體行殆而貽其憂則以壞名灾已而致其辱亦常

不為少彼孝衰於妻子者要不足論反不如寡夫傭奴
輩僅僅養口體而其父母常自慰悅且誇詡之蓋終身
焉無他于其窮且賤而直情能之而此顧戾焉耳嗚呼
允恭誠所謂加於人一等歟如之何使余一過山房而
油然孝愛生於中也允恭當鄉邑亂時嘗奮拔民伍接
戰城西獨挫敵鋒以完郭郭人服其義勇然不願仕進
故奉親避城以老有如漢興舉孝廉力田鄉大夫署行
義年而上之其焉避邪非樂志之尤者耶吾記姑為子

願之

東湖隱居記

出贛江東下有洲焉曰雲洲嘗聞五雲見其間故至今其邑稱五雲凡贛之山崖嶄巖削者至是而坦迤贛之灘峽東石盤者至是而舒夷又循州而東有市曰金灘半百里而遙而坦迤者盡廓舒夷者亦徐厥土利陶厥田上腴江廣之徼舟車之隘以砦以驛故居之者與城郭無異而蕭氏又擇灘之尤勝者築室以居之因其地

有湖池焉其清可以濯漑其肥可以釣漁其潤澤可以
灌焦稿化瘠以為沃遂扁曰東湖隱居而介其友謁予
記之余重其請則復之曰夫蕭氏里居金灘而家有東
湖灘動而湖靜蕭氏其樂靜者歟灘流不息而湖止不
盈蕭氏其知止不貪者歟灘磯之石則怒鼓之颼則號
風霜高潔則其底立見而湖蔭之以榆柳植之以渠荷
禽魚且有餘樂澄之不清撓之不濁冬夏靚深不竭以
充軒楹耳目之娛果孰得窺其底裏然則蕭氏之居外

侮不能侵殆所謂風雨攸除鳥鼠攸去者歟凡出贛抵雲洲而險漸平抵金灘而險悉平蕭氏既處其平又擇其勝豈易得哉吾友吟咏倡酬其間足增東湖之重然則其雅尚斯文又可知已殆蕭氏子孫孫子八世莫與京也以是記于壁遠徵于方來

龍山小隱圖記

雪竹之溪金龍之山有隱居者焉曰蕭君福可氏福可生長承平時既壯而浮游江湖未老而逍遙泉石崇本

而謙撝家和而身潤田園約而子孫蕃莫年不出戶庭
而交游風月無虛日及是世亂且一紀入其境復如未
亂時嗚呼可為福也已渝川孫君碧霄避地焉依君一
見知為奇士即避堂以館之孫君忘其羈旅居間歲則
取幅紙為君圖龍山小隱盡用郭熙家法而以趙千里
遠景參差映帶咫尺而有無窮之勢將持為君壽辱先
示余曰積日而成之殆天機所到也吾未嘗為人作及
此也先生其為蕭君序之余諦觀不忍釋手嗟乎福可

也能使碧霄每況益清如是其高自標致詎有涯哉是
圖也層巒而疊巘奔濤而湧霧其間有若神仙中人騎
驢渡橋者非青蓮居士則浣花老翁也有長松落落四
五如虬如龍而兀兀一茅亭其間囊琴而坐者其昭文
氏之無成虧與有瀑布千尺起而引睇者有瑤草黃華
赤楓丹桂心賞而神融者非劉紫桑陶隱君所託而寄
歟文鹿也濠梁之所逐與馴鶴也孤山之所放與祝雞
也尸鄉之學仙歟垂釣也桐廬之客星歟古之君賢其

人而不得見則或圖其居而觀之圖固甚有補也為蕭氏族里者聞福可之風而興按圖而得龍山之勝槩讀吾文而想像古之數君子者苟巢及其一焉皆足以垂光無窮此碧霄畫中史筆意也福可有賢孫曰魯者從予學經術志昂而才逸必將擴大其家聲其福蓋未艾也然則是圖愈遠而愈耀矣

泰和縣新修城隍廟記

洪武三年六月皇帝若曰載稽祀典城隍廟貌宜從改

作廟在府者如府治之制在州若縣者如州縣治之制
舊有土偶像設者胥毀為塗墍在兩廡者還以塗兩廡
壁在正中者還以塗正中壁而圖畫雲山於壁上凡神
座几席悉如官廨儀署其主第曰某所城隍之神大哉
制乎一洗末俗之陋以從祀典之正於是省部斟酌格
式移諸外省外省欽承惟謹下諸屬郡罔不虔奉泰和
令尹嘉議大夫前御史劉公宗啓政肅人和令行衆趨
刻日庀工暨厥僚佐縣丞陳君舉善主簿楊君禹鼎典

史許君宗禮相協後先度地之宜而斥大之取材之良而謹施之量氓之任而分畀之旦省而暮程寬撫而嚴督縱廣崇庠纖悉如法門廡庭室幕舍靡不宏偉軒朗上以稱睿旨下以悅輿情遠近聳觀嘆未始有盤盤翼翼美輪美奐實為廟貌之甲豈直一邑之鉅麗而已哉亦既落成耆老祝史等來請文刻石僕常讀吳文正公廟記蓋曰城隍亦后土之類也古者八蜡若水庸若郵表畷莫不祝而報之況城與隍域民而衛物捍外以集

內厥功懋焉不有以嚴祝之可乎禮雖先王未之有而
可以義起者城隍是也其所以廟而不壇者又以棲配
享之神昔漢高祖以灌嬰下江南而江南祀城隍類以
灌將軍配是也文正公之言淵博明通足裨禮典之未
脩而我聖天子斷自宸衷黜刻昏俗致城隍之神有高
明穆穆之居無淫瞽屑屑之黷誠曠世之盛美也抑傳
有之先成民而後致力於神民和而神降之福邑長貳
有焉蓋其勤宣上德茂植民功殆與廟貌相為久遠而

神之降福斯民永永無疆者孰非惠化之所敷遺乎皆不可不書以是刻于石用昭示方來

初堂記

凡物莫不有其初萬物本乎天天者萬物之初也人本乎祖祖者人之初也尊祖故敬宗有百世不遷之宗則百世一初也有五世則遷之宗則五世又一初也學者嚴明初名其書室曰初堂自其高曾大父以及祖父兄若遺文若出處行已之跡若奔竄艱難之故靡不記憶

不忘時時誦道之若子誠能念厥初矣猶懼後嗣之或
昧焉謁予記于堂中余聞宋季年有以中書校勘杜門
隱居博學善鑒喜好清事交游巨公者山臞翁也翁生
長於嘉定中至淳祐丙子嘗作春窩記以見志讀之槩
可想見其人焉有元盛時有以布衣游京師挾倚馬萬
言之才負麾斤八極之氣公卿交辟之而性特骯髒不
屑常調輒云非御史不為故獨以古文馳譽於朝野者
校勘之孫吾廬先生也先生二子孔陽膚敏膚敏隨侍

入京筮仕為翰林銓寫會亂不知所終孔陽不務榮達鄉稱善人是生明初年令且半百五世止一身又似續未有嗚呼安得不重念其初安得不重記於斯堂哉孔陽吾朋也明初吾徒也吾老且七十尚安得忘情於斯哉吾又以明初苦學強記覽治尚書食舊德雖間關亂離奉二親處深山如平居其不忝厥初如此既嗒焉喪偶又為遊兵掠其二子夙夜慄慄常憂無後為不孝之大其務永厥初如此吾安得不為明初記之哉又安知

天之報施善人春窩冲氣元貞貞元不自今始母徒曰
了了了一身而已有不五世其昌八世莫與京乎傳曰必
復其始此初之說也明初其俟之

三顧書隱記

夫隱者君子獨善之名也苟達焉斯無取矣達而欲兼
是名則或肆為瑰辭以擎取之大朝市小山林以歆動
之使人哆然日趨於大而鄙其小然則去隱則遠矣隱
固有大小乎哉甚或立乎兩間自名中隱不夷不惠非

狂非狷可貴可賤君子蓋滋惑焉陳君守道讀書三顧山下味貧之樂飽德之腴若將終身故名其室曰書隱所司以賢良強起之徵試考功優合渠度論定且入官固辭老疾願返田野當道可之會稽許如珪又為作三顧書隱圖以華其歸歸以介余記嗟乎是山清節先生讀書臺在焉先生真隱也非招也以春秋授忠簡胡公令其遺書具存守道熟復而精察之有立於身有垂於後如是而已其為隱也不亦大乎

鏡湖書隱記

古之君子窮而處於下以求其志謂之隱達而用於時以行其學謂之顯及其澤施於民物功銘於旂常辭榮去寵以養其真全其天則謂之歸隱焉隱與顯非二致也時焉而已矣後之君子達焉溺而不知止甘受妨賢冒祿之戒隱焉絕人以逃虛恒召捷徑盜名之謗斯二者皆過也會稽古名郡鏡湖實天下奇勝在唐賢有若賀知章躋位通顯而老於其間在宋賢有若陸放翁隱

處山陰而大顯聞於時自餘若二賢高燭者宜亦多矣
葉君叔昂讀書鏡湖得施翁宅西之湖塘居之面山臨
水鳬鷗出沒漁樵往來遠城市而閱煙霞賀陸之清風
雅韻隱約具存及其筮仕司征於西昌乃介余記之余
惟知章開元盛時為禮部侍郎集賢學士天寶中乞歸
田里為道士御制詩送之詔賜鏡湖剡川一曲自號四
明狂客見李白即解金龜換酒放翁豪邁冠時任至秘
書監志復神州北望慨然長歌鏡湖中嘗夢與蓮華博

士游月給酒千壺二賢皆天人也邪不然何磊砢英特
軒軒物表如是哉叔昂所讀之書所隱之地皆賀陸之
遺也今茲發硯未展素蘊行將受民社獵公卿立言立
功以與二賢相輝赫然後返乎書隱千秋觀之荷花無
恙也劔南集之藻詞可賡也不亦隱顯一致流譽無射
乎是為記

梅澗記

大凡負異稟者脫畧乎其羣雖草木亦然夫草木而負

異稟必浩然竒芬現然碩貌發於名賢之詠歌方青陽
展和高下瑣尾無不散柯布條眩彩矜馥而牡丹獨殿
而王之此異稟也及朱明司暑榴蹙葵傾蘭葩芷榦而
蓮獨出淤泥濯清漣天然去雕飾比德於君子此異稟
也秋則小山藜桂擅於淮南冬則孤山寒梅傲於幽朔
細不踰粟而根柢月窟誰能弟之皦然不滓而百卉盡
廢誰能魁之凡此非負異稟而能然邪物且然矧於人
乎故以人而自況於物者有矣況於物不況於常物則

亦取其異稟而相類者耳平川周景元夙負異稟其執
友別字之曰梅澗况其丰姿雅度言貞而氣溫也復介
予為記勉其進修不于其名于其實也余聞昔洛陽賈
侯為縣時雅與士人游暇即衣冠揖讓分題角賦而閱
試焉矜其不度而指授焉景元以諸生在列侯每進而
詩好即譽道之不置未至則改定以成之夫幼而得於
師友之薰陶若梅之有本澗之有源長而成於賢大夫
之追琢殆梅之夭葩澗之文瀾矣其出羣也則宜或曰

梅澗信美抑熙明之時衆芳之會桂列明庭蓮在靈沼
牡丹榮上苑尤為脫畧草木之羣者而梅顧獨在澗得
乎余曰然有異稟者有異施也景元其益勉於學乎

安晚堂記

興國貳令沈侯司平言於僕曰家有嚴君踰七望八夷
曠以永日清狂如少年燕處之堂題曰安晚義本於老
者安之其自命也僕悚聞焉而侯具道之僕曰乃令識
尊公請為之記以寫侯數千里之思乎夫公前朝之耆

壽俊也晚而全五福於湖山形勝之間超然月露烟雲
之表安孰加焉夫晚者天之嚮晦者也人之所同有也
而適所安者寡矣經營分表以求安者累其天者烏乎
安日暮途遠倒行而逆施之者戕其天者也茲不安矣
故不知安之為安而行乎吾素貧不加戚富不加欣者
安晚之尤者也知其為安而苟止苟足一介不妄取予
者其次也沾沾而求鼎鼎而獲一飯不啻多者又其次
也若尊公者勅家事如向子平稱善人如馬少游東山

絲竹如謝太傅出入左右車中長文膝前文若又如太
丘之與朗陵所謂忘其安之為安非安晚之尤者乎又
其雅好種菊菊有雅節能大耐淵明愛之公亦愛之斯
亦安晚之高致也客曰子論博哉抑見公之跡未覩其
心也蓋公安於晚者以有令子能以志為養也傳云子
之能仕父教之忠令貳令遠違色養第以意問為起居
而公嘉其居官能貧常致伏臘之羸堅其冰蘖之操公
之心為何如邪僕曰此安晚之餘事也然則足以見公

脩脩物表夫豈尋常世故可芥蒂其胸中哉

竹坡齋記

清江鄧養吾齋前植竹一坡因以名齋其僑青原也謁僕為記僕聞之君子比德於玉玉者天下之至貴也唯竹亦然君子亦比德焉故竹亦玉也若尚論其世植物之類莫尊於竹當黃帝時命伶倫取諸嶰谷以制律律成而度量權衡法度之器皆緣以起禹時制貢篠蕩與瑤琨並命周之符節亦與玉並行而周人美衛武公凡

三致詠於淇澳微武公之德不足倫儼嗚呼竹之世與
貴孰得而尚之後世或下以為捷彖子之歌所以興也
或繩以為橋蜀道之險所由越也其遏衝制潰濟深利
涉有類夫君子之大用而幽人野老託以吟咏而翫適
七賢六逸託以陶寫其憂憤則皆竹之流風餘韻也奈
之何聖賢之嗣不保其不落君子之道不保其常伸氣
化人事或不相符人或一不幸而物從之矣然則清江
之上有竹一坡託根於子之齋與子同閱甲子同傲霜

冰視橘踰為枳荃化為茅相去萬萬不以用之大小介乎志而以不適於用全其天雖自嘅亦自慶也僕與子髮皆種種視皆茫茫僕有竹無坡託記於是齋亦以寓吾坡也凡我同志翫記猶翫竹焉伶倫武公如可作也亦必油油然憫於吾與子矣嗟夫尚有如渭川千畝其人能與千戶侯等者乎尚有一窠數尺寄諸童子寺而網維日報平安者乎彼其視清江一坡為何如哉

雪隱記

士大夫出處不同轍情性不同嗜而其歸不殊致者傳
曰是則同又曰皆是也夫同且是天下之美豈復有加
於此哉宜春朱侯志德氏出處情性皆不異於人人至
其高自標致託興於雪以隱獨異人焉不知者類曰隱
非志於濟物者雪非陰陽冲和會合之所存也於侯絕
不相似其知者蓋曰侯工寫梅竹梅待雪始英竹冒雪
逾勁皆隱於雪而極韻度朱侯特寓焉耳僕曰嘻近之
矣然猶膠乎其外夫隱有小大惟隱於市朝謂之大隱

又與顯對君子有隱斯有顯謂之中道豈絕人逃世者
所能專哉夫雪天地嚴凝之氣之積也雖非冲和所存
而冲和之氣常由雪以固則其暢達化育也孰禦是故
春秋書無冰謂冬溫也閔藏之不密而翕聚之蚤發也
唯雪尤然故三白兆豐深尺書大厥係之重若是然則
朱侯托於雪而隱殆比德於玉之類歟古令窮而小隱
者姑勿論論其達而大隱位極人臣者鹽虎盖深玉龍
擎重魏國公之相業也雪隱也平治險穢潤澤焦枯勢

合則色地功成則回春荆國公之相業也雪隱也二公誠異於人者而孰識其同哉亦容有議而非之者而孰究其壹歸於是哉易曰君子以同而異先正曰不能大同者亂常拂理之人也不能獨異者隨俗習非之人也要在同而能異爾以是為雪隱記其庶矣乎

高一步軒記

金魚之南株林之浦朝舉羅氏擇勝而居之余每造焉恒由客位延致堂之西偏厯階而陞曰此高一步也因

以為扁鵲余發其義余久負諾責蓋莫適其所歸也一日過之欣然為之記曰古之君子不欲多上人然亦不肯甘為人下而不辭故易道隆謙謙則尊者愈光卑者亦不可踰此唯操無欲上人之心者能之然君子以同而異則於睽見之獨立而不懼過涉滅頂而不可咎則於大過見之此其勵志又豈肯少居人下也哉朝舉故間右名族自其大父父與余有通家莫逆之好予每見之如見其前人任俠而隆交急義而善謀處困躓不辱

挫強禦不懾遇勝時知已縱酒諧謔岑牟摻過袒跣臬
廬以為樂可謂得賢達之高致矣此高一步也韜跡於
園田全身於草昧自至正末運大明新造昔之田連阡
陌谷量牛馬者或無噍類矣權行州里力折公侯者或
淪徒役矣而朝舉嘻然桑麻之間翛然軒冕之表仲長
統之樂志榮啟期之達生蓋庶幾焉此高一步也余方
佚老時相從笑歌輸寫故樂記之昔夫子稱孟獻子曰
獻子加於人一等矣夫獻子豈欲上人者哉不欲上人

而自然居人上者加一等之謂也此高一步意也君子人也朝舉勉之

秋林軒記

武畧將軍守禦吉安千戶所顧侯文質別字秋林且以名其軒余記之曰夫秋行為金其象為兵其在物也斂華就實壯羣材而堅百穀微而飛走水陸之品莫不豐碩猥大而尤於林木乎見之傳曰風落山歲云秋矣我落其實而取其材是也夫林木嘉植也其施大用也起

尋丈以干霄漢飽千霜百霆以竭萬牛千夫之力使非
秋令之肅則春和之煦何以臻夫大成哉然則顧侯取
以名其軒宜矣侯凡兩膺誥命曰爾自常熟效順俾戍
廬陵能效鎮禦之績再命曰爾戰勝攻取多著勤勞命
爾官居列衛俾爾子孫世世承襲嗚呼秋林之中長材
出焉其簡在上心也如此其器而任之也如此其欲所
永保祿位也又如此夫豈場師之槭棘漆園之檇散所
能彷彿其萬一哉抑又論之錯舉四時曰春秋約言四

德曰仁義非春無以為秋之歟非仁無以為義之制侯
之守正不阿廉介不隨勇斷不滯皆得夫秋行之正也
而於孝友寢隆溫良如玉敦詩書而悅禮樂重然諾而
子困窮則秋林皆春意之蒨勃也人亦罕知之矣余故
記之云

養拙齋記

衡州茶陵令之玄孫楊伯友請曰宦譜荒矣惟前聞人
數遺之休不在書乎因外氏故基葺數椽容膝圖史以

為佩服花木以暢性情名曰養拙之齋先生幸辱為記
文得朝夕勗勵焉余曰子將慕潘安仁間居乎曰安仁
不妄馬安巧宦特賣拙耳石友之同歸則巧之禍也抑
將為柳子乎曰柳子乞巧誠忿嫉耳終黨王叔文不悟
豈抱拙誰愴哉夫潘與柳才之雄文之宗也吾敢窺其
藩乎吾惟春誦夏絃三冬文史足用以求鄙志庶幾不
辱而已余勉之曰養拙莫如讀書書者天地聖賢之心
古今人物之鑑也其中有大巧拙存焉天之於衆形匪

物物刻而雕之也果巧乎孰尸之果拙乎孰加之聖賢亦然孔孟當春秋戰國轍環天下所如不合拙亦甚矣然而不枉道不從時未始拙也潘柳誠拙乎哉聖賢誠巧乎哉故世所云拙者皆希乎巧者也伯友以是自警則幾乎道矣是為記

存心堂記

廣東布政使黃州徐侯驛駐快閣登覽之暇時時為士友用小篆作大書極飛動森嚴可敬於是郭子善罷曰

先人有存心堂以遺後不得紫薇香露揮灑以顏之堂
雖構與未構同雖魚猶未魚也布政嘉而與書馬既顏
之矣亟請於予曰不得先生記文無以發前人幽光侈
布政榮寵堂雖顏復與未顏何異余亦嘉之則復之曰
若知爾先人之存心乎其要在於子孫之昌且蕃耳今
子襲箕裘守桑梓楹軒之間嘉花異草清泉美石所以
娛玩其耳目色養於慈顏者無所不備可謂昌矣佳兒
立竹其吾伊者琅鋸梨栗者嬌癡襁褓者娟好可為蕃

矣先人以存心遺後者遠而子善不替先人之存心方興而未艾是乃為善之福抑宰物者實相之哉堂雖舊而扁則新不辱夫大人君子之黼黻有如此者雖然扁既新矣而堂之故尤有足書者蓋藥市存焉子善之先人元亨嘗曰處卑而思利物居約而務廣施獨醫藥為近狄梁公之寵貴賤苛細靡不儲韓康伯之價權豪窮困靡有貳吾將幾焉積之之久求善藥者至自旁邑飲良劑者上至王公鼎鼎乎必郭氏焉歸於是存心於一

堂者不獨以遺其後嗣又推以利夫多人此其先德之美而子善佩服之有加無損焉益知子善之存心即其先人之存心其嗣世之蕃且昌宜哉是以記於堂中列於布政篆書下方嗚呼又將八世莫與京乎

東陽讀書處記

邑庠生劉仲賢從余學易扁其藏修之所曰東陽讀書處而請記以自勗余嘉其志卓則記之曰邑城門東出者扁曰東陽門生讀書城門內故扁書室亦以東陽揭

之夫東陽之義稽諸大易最著而於生之年德為最似
於生之學問為最切也昔者伏羲先天卦位離居東大
明之所由生也文王後天卦位震居東萬物之所由出
也離居東乃扶桑之旭震居東乃青陽之春故說卦曰
帝出乎震又曰震為大塗言品彙之衆林林總總下至
飛潛動植勾萌甲拆莫不胥此塗出皆青陽之春實鼓
動之然萬物既出於震得扶桑之旭以麗之則幽隱者
無不燭鬱結者無不伸已發者暢茂欲舒者條達生意

勃然莫之能禦矣吾故曰東陽之義於易最著其不然乎而生英妙之年如東陽謙和之德如東陽不獨以其居近之也雖然學在是矣東陽者天地溫厚之氣所存也於天德為元於心德為仁元者衆善之長仁者五常之君聖門之教惟在於求仁而已苟能用力於仁由一事以至於事事由事事以該夫全體全夫心之德即所以全夫天之德也故顏子之為仁乾道也冉子之為仁坤道也乾道奮發而有為坤道靜貞而有守生必從事

於斯尚加勗哉法兩作之離使知無不明法洊雷之震
使行無不果擇善而固執之君子之事脩矣尚加勗哉
以是記於讀書處有以日自省焉其必曰古之學者為
已

雲松山房記

給事中羅子實世本長沙人其父游仕吉安因占籍焉
子實讀書青原山下取太白巢雲松之句扁其讀書之
所曰雲松山房洪武十四年以才賢選入京二月授給

事中小心謹畏以恭其職夙夜不怠以精其能實稱上
旨九月除蘇州常熟縣丞陞辭以年未登學未優大懼
弗堪任以速官謗懇懇具陳上甚嘉之特放還鄉使得
卒業子實既獲如志念長沙之宦譜仰廬陵之文獻而
益追太白廬山攬結之勝若將終身焉夫五老峯之高
標金芙蓉之秀色千古猶一日太白往矣而其天游觀
物者猶可想其振衣於千仞之岡也夢寐風采者猶疑
見顏色於屋梁之落月也超然天地之間可以不死豈

不表表愈偉哉夫何所獨無雲松雲松何所不可巢然
巢之非其人雲松如將免焉巢之必如太白斯雲松有
耀矣子實讀書於山房歛在天之雲歸諸叅天之松日
歲焉修焉以傲乎墳索之樊圃息焉游焉以尋夫簞瓢
之樂事車服器玩不萌於所思狗馬聲伎不牽於所好
澹泊以明志寧靜以致遠可也如是則雲固上下而相
從松亦茂悅而頤交矣雲歲乎松也松津潤光澤上蔭
乎百尺之絲下資乎千歲之苓君今日之涵養以之松

承乎雲也則雲蓄聚汪濇固將為霖為雨育萬物而溥
羣蒙君異日之發施以之然則雲松之巢殆君子窮養
達施之地乎聖上特放還鄉者欲俾子實極其窮之所
養然養之而充抑豈終窮而已哉尤將大其達之所施
子實必慎勗之故余為之記以徵於來日

壺隱記

仙人有經濟有窮達皆其所自為游戲耳出而為天子
外臣若張子房陳希夷輩道濟天下而不居其功夫是

之謂達隱而為方術技士起人疲癯殘疾而德不勝計
夫是之謂窮窮達雖殊致其為經濟則一皆其所游戲
也廬陵有隱君子蕭與恭氏慕仙人之窮者也寄興於
藥市別字曰壺隱夫壺公者天上之謫仙人也謫之於
天而隱於一壺謫之於天其來也高明隱於一壺其藏
也微密收斂其高明獨天知之發舒其微密則天始露
而人或窺其一矣然惟費長房獨能識之世人見之者
獨見其壺耳壺之所有天地萬物皆具焉其大無外其

小無內放之則六合充周歛之則大千毛髮也攀而即之者長房也玩而樂之者與恭氏也與恭氏美鬚髯如銀雪秀眉宇如紫芝孝友隆乎人紀信義孚於朋友其蓄善藥不貳價不規利賢於宋清其與物慈惠急人之急甚於韓康伯故能與壺公長房神交於物表天游於人間雖不必達而在上而經濟之體用具是矣余往來蕭氏之壺天日久狂嬉醉賞分壺中風月實多故樂為之記云

順信堂記

臨川吳君元祐掾韶陽幕有年以才能書最仁恕著聲
軍民和豫邊徼寧一充其所立為名公卿不難屬余扁
其所寓之堂余告之曰君名祐而字亦以之非取諸易
乎請名之曰順信之堂昔者大有上九周公繇曰自天
祐之吉無不利孔子申之曰天之所助者順也人之所
助者信也履信思乎順又以尚賢也然則天人所不能
違者順信而已君子自求多祐孰大於此令夫百川者

溪澗之積也其勢順超其積之盛為江為河萬折而不
逆萬支而不窮一波一勺紆徐淪漣不達不止此天下
之大順也今夫四時者寒暑之變也變而有常雖一氣
一候升降磅礴於三十八萬七千里之外分至啓閉必
循其軌生長收藏不戾於物長短盈縮消息往來亘古
今如一日故曰信如四時此天下之大信也君子之學
思夫順必底於大順履夫信必成於大信信之極順之
至出處語默烏有不吉不利者哉元祐善於其職不阿

不激必公必是持於身雅飭以良制夫事詳閑以達可
以為順矣謹然諾而必踐樂朋游而必敦可以為信矣
然而詎止爾哉國家蒐獵崖穴需求才賢矧如君者素
席上之珍乎百川達海謂之朝宗四時成歲允資調燮
亦充是順信以施之耳自天之祐孰不其然吾固記斯
堂以俟焉

禮庭記

讀翰林詹公同文為其徒劉禮銘其禮庭蓋以君子之

學勉之也禮蚤負才諳從事天官者垂四年操几杖以從公殆無虛日故有是銘其省親而况予也復求餘言乃廣其意為之記曰禮以謹節文子聞之熟矣翰林進其學於成余則期諸用之大載稽諸經小而教訓正俗分爭辨訟非禮不備不決上而班朝治軍涖官行法非禮威嚴不行幽而禱祠祭祀供給鬼神非禮不誠不莊禮之用復有大於此者乎子之職階而升焉責而任焉講之不貫習之不狎達之而易室矣守之弗嚴出之弗

端感之而難孚矣尚勗之哉且夫儒耻一物不通而禮三千三百究其大不忽其細通其變不戾其常亦曰節文則日謹其所未謹耳子歸而質諸翰林不其然乎

蘭桂山房記

蕭君孟章顏其隱居曰蘭桂山房取晉熙郡王結幽蘭拔芳桂語也晉熙梁武第二十子賢而文遺落紛華聲利其言曰知止知足澹然無慮北山之北棄絕人世南山之南超踰世網清曼蓋可想見蕭君名山房以蘭桂

殆尚友千古者君服則儒隱則吏時可為即蕭規曹隨
吾不溺時不可為即計然陶朱吾不汙洒掃室庭玲瓏
軒窓童卯誦絃朋徒觴詠挹青原之朝爽寫螺子之夕
清亦非必絕人間踰世網固已澹然忘慮知止與足矣
夫蘭有國香服媚于人桂性馨烈卉木所忌滋之九畹
楚之三閭所好修也樹之小山漢淮南所招隱也孟章
慕晉熙不徒結之援之而又滋之樹之嗚呼賢矣哉余
髮雖種種尚能相從山之南北乃為之記且長歌之歌

曰有美一人兮盤之阿傲世態而睥睨兮其慨也歌襲
芬芳以永齡兮抱堅貞恒不磨山海稜而霧潦毒兮夫
孰能浮湛以嬋嬰蘭申申兮桂娑娑天潢肆其清潤兮
卿雲被其光華彼椒佞與荃茅兮孰為少多結佩纓而
援觴酌兮其如子何嗚呼靜與晦而俱寂兮動與陽而
同波順時幾樂夫天命兮其如子何

雪蓬記

士君子托物自況以名其齋而交游尊其德亦因以為

別字其來尚矣托者興也凡有形色性情無遠近鉅細
樸野華麗皆足以寄興得其神不必泥其實會諸心可
以忘乎言至使不識其人者猶想像而慕蘭焉斯不亦
美乎今陝州知州事聞人侯彥芳佐太和時飾所寓東
偏斗室堊以塗其壁而遽以帟其上因扁曰雪蓬蓋歲
修之所托以寄興者侯與僕會金陵時與僕曰雪蓬需
子為記僕敬諾焉于時侯奉命赴汴京僕亦次第還鄉
始得坐雪蓬齋中乃記之曰蓬蓋舟所藉以庇覆其所

載者賢才亦國家所藉以庇覆其赤子也蓬之上惟雪
焉至清至白可以瑞稼穡去螟蝨且蓬戴雪又勝重也
蓬譬則侯之一身而雪其德歟士君子以身許國不能
表裏澈徹潤澤枯槁凜烈自持則不能以任大事果其
德充耶小之簿書期會大之禮樂軍旅外之刺史守宰
內之元勳碩輔無不優有餘智顯有成績譬蓬之於舟
穿溝港出陂汊盛灘石鼓濤瀾然後平臨大江迅達黃
河而人與物俱蒙其蔭不病厥載也不然夏暑雨驕陽

冬初寒烈風舟非蓬頃刻不能居與行也或曰侯嘗駕
雪篷轉輸於襄陽令茲艤雪篷布政於河南蓬亦勞止
矣噫是求雪於太陰之庭求蓬於水夷之都也名齋之
意殆不其然書曰若濟大川用汝作舟楫傳說為商哲
輔佐興令業豈嘗屢濟川而病其舟楫也耶

學村記

友人易君別字學村靳記於海桑子子嘉焉或曰是矯
也君豈嘗能村乎村貴真不學而能昔王建張籍同時

同以樂府著聲評籍者曰其不及王建者村不盡也謂其不皆自然未極於真耳村固易學哉予曰不然傳曰蛾子時術之志曰人皆作之作之不已乃造自然范蠡平吳變姓名鴟夷子皮始學賈嚴光避漢披羊裘大澤中始學漁梅福上書歸隱吳市門始學卒郭解晚而折節始學儉非不學而能也朝野之相形即野名村士農之相訾即農名村而堯時浴治於在野周時烝髦士於我農后世目咲為村者在唐虞成周不爾也不當學乎

世益降澆益滋鄙先進曰野人高後進曰君子文之敝也久矣夫子從先進禮樂夫固野哉學之固可議乎易君學村學之誠是也彼不學而能者野人不辨菽麥寒暑者之為耳野人之所為村非君子之村也如吾所云唐虞成周時君子者之村也雖然又有下流之村焉凡流俗人所尊崇慕倣者皆是也而易君無也君去榮就晦學村宜無不侶吾懼其淪野人之村欲納諸君子故樂告以斯言君曰吾既甘守環堵浮湛閭里臺笠緇撮

賢於切雲之莪莪縞衣綦巾侈於象服之委委調笑乎
蜡賓之儀崛彊乎樵夫之拜田子方貧賤之驕固多陶
徵君桑麻之趣不少也若是何如予曰其然乎幾幾於
達乎村乎孰過是乎書以揭諸座右

凝霞樓記

鷺渚之西螺山之陰有樓巋然扁曰凝霞者郭君思誠
所築也曷為築之將以極高明覽高山樂賓友也曷為
以霞命之神觀澄朗心宇明達晉人蓋云軒軒如朝霞

舉也落成之日徵予記焉遂記之曰夫室居之華因人而華人品能超由天賦故超君金相溫潔玉立娟妍自為成童從其先大夫萬戶侯出入弓刀裘馬間意氣橫逸及周旋達官名卿雍容禮法雖王謝家兒猶病其或踈弱冠應門世變轆轤善應能定履險若夷致大夫遂懸車之志高門絕鳥鼠之驚可謂令器者矣斯樓光華詎非以其人哉集斯樓也翫斯霞也寒暑候易而錦綺恒張圖畫不施而生色無晦雨晴殊致而翬飛不移春

華披而騰映夏陰結而透明絢煥汎金莖之清飛陽麗
玄冥之黯赤城之標九屏之疊羅立宇外文爛之穀晴
沙之金閃爍眉睫皆與斯樓相映發焉君伯仲間如圭
如璋如墳如麓勝時嘉集憑高眺遠樂化國之無虞念
先人之敷遺納江山於俎豆寫風月於弦匏其福未有
艾也古人喻人品况其高為孤雲野鶴况其英為瑤林
瓊樹况其重為金鐘大鏞况其朗為光風霽月然則况
以霞其翩翩濁世之佳公子乎思誠有之似之吾固樂

而記之

南康縣復秀公臺記

秀公臺者南康貳令吳公德基父所復也曷為而復之
從民志也古者大都小邑胥由卜定然山川形勢風氣
之聚若舟楫以陟巘降原升墟而望楚與京類可徵已
南康其壯哉縣乎覽厥治所中高四隤若玄武狀堂後
西偏隆然特起成墩又若其曳尾然因墩以為臺而臺
自宋丞相秀公以陳旭升之景祐間以校書郎出宰民

德之不忘遂取其謚名馬臺非徒勝槩是都抑形勢攸
繫哉洪武二年著令中外諸府寺並環築公舍長貳史
胥族處繚以高墉固以總門縱廣崇庠固或超度縣尅
日攻位適臺直少府聽事遂夷之臺前豫樟十數圍寺
門古柏一株無烈風迅雷同日應聲自拔衆駭愕然業
已建不可渝已三年秋縣老若士并力一辭懇告貳令
自臺之夷狷獷胥慶縣既卑矣固可畏忌訐誣蜩興赤
子焉所託寧縣官獨憂耶且縣有故易此必戾木有知

而既告之矣明公幸復之哉若曰豈其然乎吾達子之志亦大有理乃遷少府聽浚池之塞隆臺之平民歡超功不日而復崇加其舊又出俸錢買亭卓而覆之用慰悅民情抑以時觀游節勞佚禮賓客馬僕適道廣省校文還君引坐臺上觴酌無次指南山曰潏然翠浮爽然氣蒸非南中所可儼又指北山曰此九日嶺亦因丞相名而命之前宜玄武首起新亭扁曰壽龜池左右嘉木扶疎清風徐飄脩脩冷毛髮四序迭乎前萬景赴其下

臺庵而有之不尚可記乎僕曰然此一役也有規有頌
古不容輕廢規也復古之舊嘉與民同休頌也匪饒金
石莫惠久遠吾見公盛德美政與秀公遺愛欽于世
矣

虛白記

海桑子歸自羅浮抵上清宮息焉二子者方論道其一
崇虛其一尚白咲于列者曰聖人崇誠而子崇虛君子
尚玄而子尚白得無戾乎夫虛而不白巖洞是也白而

不虛玉石是也子各一焉而可乎二子爽然自失請業起拜咲者曰此非吾所能子往質諸江先生二子往焉先生曰吾不知也吾聞諸漆園傲吏傲吏聞諸七聖七聖聞諸天向子所聞無一可也令夫日月者司視之官不煜於晝則天者盲不煜於夜則地者冥嘗試有一物梗其中一塵滓其外哉令夫水洞鑒毛髮泓泓渟渟不測不極實之泥沙土石壅其行淤其冷豈其天邪令夫鑑之空也的的兮空青之剖而金莖之凍也熒熒兮珠

斗之芒而頗黎之浸也剡隆平霍磨垢刮翳而虛之體
始全虛體全而靜照出焉日月水鏡其形其質虛室也
日月水鏡各一其照生白也其於人也亦然肖天地之
員方具日月之精華萬物萬象吾百骸也江河百川吾
九竅也所以成吾體者皆實也所以主乎吾體者皆虛
也虛所宜虛而勿實所不當實其光明也孰禦是故耳
虛則生白而聽聰目虛則生白而視明彼實其所當虛
者榛蕪高於靈臺糞壤瘞其丹府面牆而已耳屋漏而

已耳楊子云自以為玄可也烏乎白哉二子躍然起洒然悟頤卒為弟子因祈海桑子叙之以為先生壽先生字中古積書盈車律已以法學超詣德粹謙海桑子廬陵陳謨也

悔閒軒記

里士蕭執求得國子先生景瀛宋公篆書悔閒軒三大字以遺蕭日宣氏日宣揭之觀者嘆賞有李陽冰之風咸詠歌焉屬予為之叙嗚呼日宣能守先人闔閭於城

郭兵燹之中良不易得而得此篆書張皇於軒楹俯仰
間尤不易得也他人華構高堂寧有是耶吾聞諸老子
云知足不辱知止不殆方代更時戎馬被郊豺狼在邑
國家用重典繩之日宣故名法家當事邑之賢大夫長
義兵皆以才聞年垂知命獨能知四十九年之非自悔
自閒儕輩皆咲其怯因鄙之目為村則咲曰吾不村也
遂以不村自命而以悔閒名軒殆所謂知止知足者與
學名法知名法之隱禍優游自樂且十餘年殆所謂不

辱不殆者歟人患溺而不悔斯有苦無閒鳥不悔於高
飛而悔於網羅魚不悔於深入而悔於釣餌名者誘人
之網羅也利者忘身之釣餌也易曰無咎者善補過也
又曰震無咎者存乎悔悔之於人大矣能悔則能動其
補過之心斯為無咎之民又豈特閒而已哉然則翫斯
篆也讀斯文也凡升君堂者有不悠然動於中乎

南軒記

夫君子所以敷遺其後人者無所不至也而居室為重

後人之所以保守者亦無所不至也而不失其基構為
難能不失其基構則能廣先業矣崇禮曾氏自乃祖乃
父世有積慶號稱名家所居據白下之東清平山之右
得地之勝矣而當前朝盛時豐亨豫大民安物阜有樓
觀之高明園池之映帶衣冠時集俎豆常陳其樂蓋無
涯也運往代更華屋丘墟蛙啼他沼燕失舊栖所餘者
芳草而已耳青天而已耳崇禮適丁是時辛勤拮据次
第規復雖未還舊觀而已復南軒於是以南軒請記焉

南軒者其先君子所扁也崇禮因其地不易其位新其
構不改其度揭其扁如見其親而又蒔花木以備游衍
之觀畜圖畫以供舒卷之娛具弦匏以悅嬉賞之情廣
舍館以資往來之適無不宛然舊觀藹然新致者於以
見前人之所敷遺者忠厚之澤愈遠而不泯後人之所
保者勤儉之積日益而月增豈偶然之故哉於是廣東
布政使黃州徐公道經快閣登覽吟咏之暇復揮洒篆
書有騰蛟起鳳之勢而崇禮所親為公請書南軒二大

字公欣然援筆為書崇禮裝潢揭之而余則記於下方
嗟乎崇禮仰而瞻夫布政之特書俯而思夫先人之遺
教其於立身行已出入起居有不油油然自得兢兢然
深省者乎

鳳首記

余觀曾子元記鳳首何其異邪云河南王文獻得之慶
遠安撫司掾劉明善所始至正癸巳峒氓以獻於莫安
撫莫怒氓不生致鳳而徒貢首擲於地犬啣以往劉奪

於犬口以歸又蹤跡峒氓問故氓曰天河縣大王村山中樵童見百禽喧啾如織以石擊之隨斃得禽甚富於是一村盡往每擊每獲終不散隨有禽補立獲處衆恠其異取毒矢盡驅衆禽則見中有二禽高可丈餘五色奪目射之斃其一其一冲舉而去衆禽蓋隨之其立處鳥羽覆地廣一丈厚可二尺如茵藉狀烹其肉食之甚香意山多竹殆是鳳邪故珍其首以獻然劉雖得實終不敢真以為鳳後以示南安監郡呼哩木呼哩木駭曰此鳳

首也往仕于朝外國來獻大類是見藏秘府但差小爾
王既從劉得之常函以自隨子元見時頂與味尚微紅
頂后數羽文彩尚燦爛可觀殆誠鳳矣余因記數年前
有五色大鳥從以禽數百集太和州西豫章上東西無
常衆族觀聚駭無敢彈射一二日徑去不知所之嘗疑
豈鳳當亂世而出邪今得所記足證為鳳不誣然其出
必待聖人在乎位且不免弓繳之傷又何取其為鳳也
將世大亂賢者厄運而鳳亦爾歟嗚呼西狩獲麟而夫

子反袂拭面稱吾道窮有以也夫

菊潭記

按風俗通南陽酈縣甘谷中潭水甚甘潭上山多大菊
故潭以菊名而谷中居民飲菊水者多壽上壽百三十
中壽一百下者七十八十焉夫菊金行之英啓秀於搖
落之後故騷人食之而薦以木蘭墜露所使雪潔滓穢
通達神明歛華腴於百體道貞元於本初也甘谷之民
僻在寥閭嗜欲既淺天機自深其致康強宜也金精王

侯以菊潭自況其友趙仲敬求為記之既辭弗獲則告之曰金精之山仙聖所都其靈卉異葩皆足以為長生之資十倍於甘谷然而王侯不改其初服者誠以菊抱幽人之標堅晚彫之操非瑤林瓊柯蘭芽芝葉所可倫擬也王侯飲潭水不徒壽其身將以壽其民不徒壽其民將以壽其國蓋壽其身而外天下國家者絕人逃世者之所長而非君子之所務也且人情莫不欲安欲富欲佚欲壽為之父母者不能節其力而貧之不能扶其

困而危之不能時其使而勞之則必夭傷其天年矣烏
乎壽乎民者國之大命也民心既搖國本難固烏乎壽
乎令王侯以菊壽金精之民何如哉其飲德者詎一二
而止傳曰不有君子其能國乎詩曰樂只君子遐不黃
耇侯尚勉乎哉又何美於南陽之人邪

澄懷堂記

記曰張而不弛文武不能也弛而不張文武不為也一
張一弛文武之道也夫君子之學有藏修必有息游故

有張無弛雖文武不能者言不可無也然一於弛而不
張則或蕩而無守茫洋忘歸故文武不為者言不可有
也是以洙泗之教必自志道據德依仁大本既立然後
能游於藝焉能游於藝斯一張一弛文武之道備矣太
守常公方壺名其燕處之堂曰澄懷之堂而堂之所有
則師襄之琴軒轅氏之律呂三代秦漢盤匱彝鼎金石
遺文晉唐以來法書名畫耳山海之珍茂如也公之所
以澄其懷者乃其所以游於藝歟士大夫鍾奇蘊智秀

出等夷天豈徒然生之哉窮之養養之充豈無所施哉
有一日民社之責一日致其憂有世道無涯之感無涯
以為戚其懷抱宜何如邪公雖在田野一飯不忘君猶
在朝也賀蘭之山瀛海之州君蒿懷愴之心常著存也
烏得不時一澄其懷乎嘗試升公堂鄴侯牙籤夜光明
月錯落其間唐閣立本宋李營丘諸賢圖寫粉墨蕭瑟
氣韻飛動一舒卷卧游千里一咫尺何如其快邪晉王右
軍破羌帖真蹟米南宮所題誌寶惜者周唐人冷金硬

黃時一臨摹又何適邪或乃酒家南董來商古今較治
亂如戰如訟命桑紉翁與之解圍猶然罷去而南海之
香尉巴印之橘叟輞川之摩詰浣花之少陵亦時時追
隨几杖若公者真無懷葛天氏之民歟是豈有豪傑芥
蒂以滓穢其太清哉昔人美衛武公有曰寬兮綽兮善
戲謔兮寬綽無斂束之意戲謔非莊厲之時而道存焉
武公蓋善於澄懷者宜其年八九十而德彌邵也夫武
公之學即文武之道而常侯所勉焉者也余故始終叙

次以為記且以自勵云

後隱記

唐之季錢鏐有羅隱字昭諫者累舉不第事吳越王鏐為給事有詩名讀其曲江春感知其骯髒一世不可羈紲然卒以是窮韶陽羅德存仲素先生嫡系先生三世曰海者為韶校官郡志學碑具可考德存距海六世家學本仲素風致慕昭諫別字後隱言後於隱也數介子記且曰曲江義學生徒嘗數十吾不擇薄厚教之如一

有弗克行十脗脩而成而去者多亂來廢義學即廛區
為家塾教亦如之茲所以為後隱先生不與記將無知
者僕曰子先賢之世也宜以道德尊嚴貴富賤貧勿論
昔仲素問道於河南以授延平再傳於建安端緒明白
子嘗言仲素有遺書散失不存最可恨然其存者苟能
真履實踐以淑韶人將商者去商吏者去吏頑鄙者革
善良者薰而況韶有張余侯麥文武忠孝遺烈固凜然
哉子毋以昭諫之不過坎壈嘗戚戚於世道昭諫隱而

名垂子後隱而教行其鄉不尚賢乎哉厥令昭運褰開
義學興有日為國育才子亦遠有耀焉

實林記

造化之運不消則無息不屈則無伸伸者息之積屈者
消之萌日屈於夜而伸於晝月消於望而息於朔四時
以冬為夜萬物以春為晨不消亦無息餅水是不屈
亦無伸崖石是也君子之道詎爾耳哉曲江令謝彥剛
別字實林蓋陶元翁廬起先趙子威諸公命之相期遠

且大者取諸姓以立義以為不謝則不實包括宏深願望篤厚令夫百卉千葩各天其天各一其元亨利貞榮於朝必歛於夕歛於夏必榮於春萬實告成於秋而復有花焉者蓋以秋為春也萬木歸根於冬而又有花焉者蓋以冬為春也一榮一歛一謝一實榮者其伸歛者其屈謝者其消實者其息也故元生而亨長利向於實而貞乃實之成實成斯可復為種而生生無窮焉陶元翁觀物於物外趙子威輩識盈虛於萬變是時彥剛英

銳之年卓犖之器金玉之相杞梓之章故期之以實者
將欲歛其華也彥剛以才選試用皆大藩大府或冰霜
栗烈或煙雲清潤或日星炳輝其榮其歛其謝其實凡
幾矣金百煉而成剛水萬折而必達最后由兩府出尹
新建再調曲江得百里之地而弛張翕闢之惠化流豈
弟令聞暢遠邇公庭之暇考古今發嘯咏有益於身心
甚大謝於彼而實於此一何盛歟雖然百卉千葩莫不
有實獨梅實為鼎鼐之用以其調和羹比諸燮理陰陽

也嗚呼君之實詎止形於曲江邪蓋跋子望之子是以
記之君姑孰人郡之山曰青山山有謝公池齊玄暉隱
處也蓋君始祖云

蕉境記

瀛海之間齊州之內有佳境焉其地曠而平無堆阜崖
岸沮洳之險其民樸而茂無詭怪城郭刻薄之為其四
時之氣淑以清無震凌淒慘炎歊之毒其俗禮讓而無
爭其耕桑畜牧蕃植猥大而無蟲賊瘴蟲其花卉常春

其烟雲風月常妍媚其魚鳥忘形常近人不驚也古今
名人韻士無論隱顯貴富賤貧苟有志者皆能入乎其
境伊呂以耕釣入焉夷齊以采薇入焉甯戚叩角而來
游顏子簞瓢而徑造曹參清淨以常居汲黯卧治而獨
往若此甚衆董生以下惟劉伶以酒德建安七子以詩
竹林五君以逸而顧愷之以飡蔗入焉晉史稱愷之癡
絕為桓溫叅軍多才逸氣每食甘蔗恒自尾至本人或
怪之云漸入佳境蓋由澹而入也諸葛武侯曰非澹泊

無以明志愷之殆得之夫蔗本天下之至甘愷之目為
佳境信矣然興也寓也豈誠旨於物耶誠癡耶推其志
殆吾前所云云者良是其心固泊然與神明居蔗尾云
乎哉同愷之著姓千載之下為吾太和賢太守光遠自
號蔗境翁僕不及拜風采然令德令望得諸曲江令謝
彥剛為多寶豈弟父母及韶太守堅白徐公上官僕拜
焉語僕曰顧太守在疚甚為太和民物致其憾僕第太
息下州寡德如此哉既而朝廷強以墨綬起視事於是

徐太守及叅軍王簡夫而次相與歌詠蔗境以為好咸
羨公之才之志所立卓卓如是即一動靜一服食一出
處皆佳境所在夫志於愷之是亦愷之而已矣予遂為
之記嗟乎公尚能一味之甘分之否乎

柳溪漁隱記

白下之西柳溪之上有隱君子曰楊子良氏託於漁以
自隱焉於是毗陵池海玄為圖之同里海桑道人為記
之曰古今之漁皆寓也昔太公漁於周一漁而得玉璜

子陵漁於漢一漁而得客星王璜以佐文王造宗周客
星以相光武表一代名節其為漁隱也大矣然其初皆
寓於隱也寓於隱而不滯於隱斯達士之高致而庸衆
人所望洋而歎恍然以驚者也今子良氏之漁將取玉
璜乎昂彛旗常之勳非大賢名世者孰能為將取客星
乎絕人逃世之事又君子中道者不屑為子良氏之漁
直漁於江湖之崖渤海之島耳直漁於風月山川以相
賓主蛟龍罔象以相娛樂耳賀知章之酒船日相往還

陸龜蒙之筆床釣具無不自隨張志和之青箬綠蓑桓
圭衣裳不與易也此真隱也雖有玉璫數十事曾不足
以勞眉睫而申申焉屈伸脚於蓬底客星亦終古安敢
動耶是故五嶺之南一漁兩淮之間亦一漁也北平盧
溝之上又一漁也將無所不漁何漁非樂題曰柳溪漁
隱夫孰謂不然

海桑集卷七